

欽定全唐文

欽定全唐文卷八百十八目錄

鄭延昌

奉修神主請參詳典禮奏

王瓘

廣黃帝本行記

薛易簡

琴訣

陳康士

琴調自敘

張元晏

皇第十一男禎封雅王第十二男祥封瓊王制

授龐從武寧平難軍節度使改名師古制

授王敬堯武寧軍張珂彰義軍節度使制

授馮行襲昭信軍節度使制

授李思敬宣武軍李繼顏保大軍節度使制

授王潮威武軍節度使制

授李繼徽秦州節度使制

謝時相啟

謝時相啟

謝集賢相公啟

謝奉常僕射啟

謝奉常僕射啟

謝尚書丞郎給舍啟

謝衣段啟

謝宰相啟

謝草詞啟

未名試先與奉常啟

未名試前與孫相公啟

上承旨崔侍郎啟

先與承郎啟

下元金籙道場青詞

李浦

通泉縣靈鷲佛宇記

莫休符

桂林風土記序

欽定全唐文卷八百十八

鄭延昌

延昌字光遠咸通末進士遷監察御史擢司勲員外郎翰林學士累進兵部侍郎拜戶部尚書以中書侍郎同中書門下平章事兼刑部尚書以病罷拜尚書左僕射

奉修神主請參詳典禮奏

伏以前年冬再有震驚俄然巡幸主司宗祏迫以蒼黃伏以移蹕鳳翔未敢陳奏今將迴鑾輶皆舉典章清廟再營孝思式備伏請降勅命所司參詳典禮修奉

王瓘

瓘廣明二年官閩州晉安縣主簿

廣黃帝本行記

黃帝以天下既理物用具備乃尋真訪隱問道求仙冀獲長生久視所謂先理代而登仙者也時有寧封子爲陶正有神人過爲其掌火能出入五色煙久則以教封子封子積火自燒隨煙氣上下一旦飛去往流沙食飛魚暫死二百年更生黃帝師其道從封子游於蘭沙使風后負書常伯荷劍旦往洹沙夕歸蒲晉行萬里而一息洹流如沙塵

足踐則陷其深不測大風吹沙如霧霧中多神龍魚鼈皆能飛翔有石藍青色堅而甚輕從風靡靡覆於流沙之上一莖百葉千年一花故甯封子遊海詩曰青藍灼爍千載舒白齡暫死食飛魚有務光子身長八尺七十神仙者也有赤將子輿者不食五穀啗百草花長年有容成公善補導之術守生養氣谷神不死能使白髮復黑齒落復生帝慕其道乃造五城十二樓以俟神人卽訪道遊華山首山東之泰山時致怪物而與神會通接神人於蓬萊迺乃接萬靈於明庭京兆伸山寒門甘泉谷口黃帝於是祭天圜

丘將求至道卽師事九元子以地皇元年正月上寅日齋
於首山復周遊以訪其道將見大隗於具茨之山方明爲
御昌寓驂乘張若謂廩前導闡滑稽後從至襄城之野七
聖皆迷遇牧馬童子問途焉若知具茨之山乎曰然若知
大隗之所存乎曰然黃帝曰異哉小童非獨知具茨之山
又知大隗之所存乎請問爲天下小童曰夫爲天下者亦
若是而已矣又奚事焉余少而自游於六合之內余適有
瞀病有長者教余曰爾乘日之車而游於襄城之野今余
病少痊余又且復遊於六合之外夫爲天下者亦若此而

已矣又奚事焉帝曰夫爲天下誠非吾子之事雖然請問
爲天下小童辭黃帝又問小童曰夫爲天下者亦奚以異
乎牧馬哉亦去其害馬而已帝再拜稽首稱天師而退帝
曾省天皇真一之經而不解三一真氣之要是以周流四
方求其釋解乃至圜丘之上其國有不死之樹食其實與
葉人皆不死丹巒之泉飲之長生有巨蛇害人帝以雄黃
逐之畱一時而返帝令三子習服之皆壽三百歲東到青
邱見紫府先生登於風山受三皇內文天文大字以勅召
萬神役使羣靈南到五芝元澗登元隴蔭建木觀百靈所

登降採若乾之芝飲丹巒之水西見中黃子受九茹之方位北到鴻隄上具茨見大隗君黃蓋童子受神仙芝圖十二卷登稽山陟黃屋開石函發玉笈得金鼎九丹之經復授九轉之訣於元女南至江登熊湘往天台受金液神丹之方聞廣成子有道在空同山見之曰聞吾子達於至道敢問至道之精吾欲取天地之精以佐五穀以養人民吾又欲官陰陽以遂羣生爲之柰何廣成子曰汝欲問者物之質也汝欲官者物之殘也自汝理天下雲氣不待族而雨草木不待黃而落日月之光益以荒矣汝佞人之心翦

翦者奚足以語至道哉黃帝退捐天下築特室藉白茅閒居三月復往邀之廣成子南首而卧黃帝順下風膝行而進再拜稽首而問曰聞吾子達於至道敢問治身柰何可以長久廣成子蹶然而起曰善哉問乎來吾語汝至道之精窈窈冥冥至道之極昏昏默默必靜必清無勞汝形無搖汝精乃可長生目無所見耳無所聞心無所知神將守形乃可長生慎汝內閉汝外多知爲敗我爲汝遂於大明之上矣至彼至陽之原也我爲汝入於杳冥之門矣至彼至陰之原也天地有官陰陽有藏慎守汝身物將自壯我

守其一以處其和故我修身千二百歲矣吾形未嘗衰也
黃帝再拜稽首曰廣成子之謂天矣廣成子又曰彼其物
無窮而人皆以爲終彼其物無測而人皆以爲極得我道
者上爲皇而下爲王失吾道者上見光而下爲土今夫百
昌皆生於土而反於土故將與汝入無窮之門以遊無極
之野我與日月參光與天地爲常當我緝乎遠我昏乎人
其盡死而我獨存乎黃帝得道之要復周遊四海車轍馬
跡丹井遺書往往而有越元闕見中黃丈人登雲臺入青
城天國之都見寧先生受龍蹻之經築壇於山上封寧先

生爲五嶽丈人使嶽神一月再朝嶽神洒六時之泉以代
晷漏帝問先生真一之道先生曰吾得道始仙耳非是三
皇天眞之官實不解此真一之文近皇人爲扶桑君所使
領峨嵋山仙官今猶未去可往問之帝乃到峨嵋之山清
齋三月得與皇人相見皇人者不知何世人也身長九尺
元毛被體長皆尺餘髮纔長數寸其居乃在北山絕巖之
下中以蒼玉爲屋黃金爲牀然千和之香侍者皆眾仙玉
女座賓三人皆稱太清仙王方見皇人飲以丹華之英漱
以玉井之漿黃帝匍匐旣至再拜稽首而立請問長生之

道皇人曰子旣官四海復欲不死不亦貪乎帝曰萬兆無
主則相陵暴今爲制法足以傳後私心好道遠涉四海幸
遇道君願垂哀告竊見真人食精之經徒省其文而弗綜
其意挹其辭而不釋其事乞得教誨皇人大驚良久乃答
曰汝安得聞見此乃金籙之首篇上天之靈符太上之寶
文矣白日昇天飛步虛空身生水火變化無常此天仙之
真惟有龍胎金液九轉之丹守形絕粒辟除萬邪役使鬼
神長生久視乃血脉流宣腸化爲筋百災不能傷延期至
億千則惟有真一食五牙之文此二事但使南斗君領錄

參於太常棟籥自非仙人四千年一出約皆不得背科而
妄泄也又西王母秘此書於五城之內其外衛備有仙樓
十二藏以紫玉之櫃刻以黃金之札封以丹芝光華印以
太上中章其無仙籍者不得聞知也子未可聽天音於地
耳矣便可去也帝答曰昔已受神丹於元女惟未受五牙
食真之經今運會得見道君既不以授生道是臣相命不
得度世耳因叩頭流血唯乞愍濟太清三仙王復愍助之
曰此子先世有功德及鳥獸故芳氣之流光於帝位何爲
隱其真牙之經乎可教而成之也皇人命帝坐而告之曰

汝向所道之經蓋上天之氣歸於一身一身分明白了可長存耳夫人有生之最靈也不能自守其神而却眾惡若知之者不求佑於天止於其身則足矣且一身猶一國也胷腹之位猶宮室也四肢之列猶郊境也骨節之分猶百官也神猶君也血猶臣也氣猶民也故知理身則知理國愛其民所以安其國吝其氣所以全其身民散則國亡氣竭則身死亡者不可存死者不可生所以至人消未起之患理未病之疾堅守之於無事之前不追之於既逝之後民難養而易散氣難保而易失審威德所以固其理割嗜慾

所以成其真然後真一存焉三一守焉泥丸絳宮丹田三
一之宅也子勤守之萬毒不傷漱華池食五牙便爲真仙
矣吾受此經於九天真王今以相付存之於口名曰朱鳥
之丹取之於身名曰真一勤乎祕哉大有旨曰五穀爲剖
命之鑿五牙爲長生之根也帝受道畢東過廬山署九天
使者秩次青城丈人比御史主總仙官之籍爲五嶽之監
司也帝又封濤山君爲九天司命主生死之錄復以四岳
皆有佐命之山而南嶽孤峙無輔乃章祠三天太上道君
命霍山爲南嶽儲君濤山爲南嶽之副以貳其政以輔佐

之乃寫九州山川百物之形又作五嶽之圖用傳於世帝
鍊石於縉雲之山有縉雲之瑞立縉雲之堂丹邱存焉帝
藏兵法勝負之圖六甲陰陽之書於苗山帝又合符瑞於
釜山奉事太乙元君受易形變化藏於空同之巖帝考推
步之術於泰山稽力牧著體診之訣於岐伯雷公講氣候
於風后窮律度於容成救殘傷綴金治之事畢該秘要窮
究道真傳陰符則內合天機外合人事理天下南洎交趾
北至幽陵西極流沙東界蟠桃帝曰吾聞在宥天下不聞
理於天下我勞天下久矣息駕元圃以反余真也修封禪

禮畢乃採首山之銅鑄鼎象物鼎成以象太一於雍州其
鼎知吉知凶知存知亡能輕能重能息能行不灼而沸不
汲而盈自生五味真神鼎也遂鍊九鼎之丹服之以丹法
傳於元子重盟而付之丹經藏於九疑之東委羽之山承
以文玉覆以磐石金簡玉字刻其文帝又以靈寶五符真
文金簡書之一通藏於鍾山一通藏宛委之山帝所鑄劍
鏡鼎器皆以天文古字題銘其上或有秘識之詞焉時薰
風至神人集成厭代之志畱冠佩劍舄於鼎湖極峻處昆
臺之山立館於其下有馬師皇者善醫馬通神明忽有龍

下於庭張口閉目師皇視之此龍有病乃引鍼以鍼龍口
中以牛乳煎甘草灌之龍病卽愈師皇乘龍而去黃帝聞
之自擇以戊午日昇天果有黃龍垂胡鬚迎帝帝乘龍登
天與無爲子及臣僚昇天者七十二人其小臣不得上者
攀斷龍鬚及墮帝弓小臣抱弓而號因曰烏號弓萬姓仰
天而呼因名其地爲皇天原亦名鼎湖其後有臣左徹削
木爲黃帝像率諸侯而朝奉之臣僚追慕取几杖立廟而
祭之取衣冠置墓而守之於是喬山之冢黃帝曾游處
皆有祠焉五百年後喬山墓崩空室惟劍與赤鳥在一旦

亦失去黃帝居代總二百一十年在位一百年昇天爲太
乙君又爲軒轅之星備黃龍之體在南宮之中後代享之
列爲五帝居中配天蓋黃帝土德中央之位兼總四方也
以鎮星爲子上配五老下配五帝黃帝之子昌意居弱水
昌意之弟少昊帝妃女節所生也帝之女溺於東海化爲
鳥名曰精衛常銜西山木石以堙東海焉少昊名摯字青
陽卽帝位號金天氏黃帝之子也顓頊高陽氏黃帝之孫
也有聖德在位七十八年九十八歲母蜀山氏都商邱濮
陽禹強黃帝之允顓頊之子與顓頊俱得道顓頊爲元冥

禹強爲北方水神帝嚳高辛氏黃帝之孫帝生而神靈自
言其名都偃師在位七十年年一百五歲帝堯陶唐氏黃
帝元孫姓伊祁名放歎興於定陶以唐侯爲帝都於平陽
在位九十八年年一百八十八歲帝舜有虞氏姓姚名重
華黃帝八代孫都蒲坂年百歲得道登遐於九疑之山夏
禹號夏后氏黃帝元孫姓姒名文命殷湯黃帝十七代孫
黃帝子孫各得姓於事帝吹律定姓者十二少昊有子姓
曼頽頊姓姬堯姓伊祁舜姓姚禹姓姒湯姓子又張鄧軒
路黃寇朱酈白薛虔資伊祁申屠黃公托跋黃帝有子名

封一國總三十三氏出黃帝之後子孫相承凡一千二百五十年自黃帝己酉歲至今大唐廣明二年辛丑歲計三千四百七十二年矣

辭易簡

易簡僖宗時人官待詔衡州耒陽尉所著琴訣琴說宋史通志通考俱見著錄

琴訣

琴之爲樂可以觀風教可以攝心魂可以辨喜怒可以悅情思可以靜神慮可以壯膽勇可以絕塵俗可以格鬼神

此琴之善者也鼓琴之士志靜氣正則聽者易分心亂神
濁則聽者難辨矣常人但見用指輕利取聲溫潤音韻不
絕句度流美但賞爲能殊不知志士彈之聲韻皆有所主
也夫正直勇毅者聽之則壯氣益增孝行節操者聽之則
中情感傷貧乏孤苦者聽之則流涕縱橫便佞浮囂者聽
之則斂容莊謹是以動人心感神明者無以加於琴蓋其
聲正而不亂足以禁邪止淫也今人多以雜音悅樂爲貴
而琴見輕矣夫琴士不易得而知音亦難也易簡嘗慕昔
賢悉善鼓琴自九歲學之至十二拊黃鍾雜調三十曲工

三峽流泉南風游弦天弄十七歲彈胡笳兩本鳳游雲鳥
夜啼懷陵別鶴操仙鶴舞鳳歸杯沈湘怨楚客吟秋風嵇
康怨湘妃歎閒弦白雪秋思坐愁游春綠水十八弄後益
苦心周游四方聞有解者必往求之凡所彈雜調三百大
弄四十善者存志精之否者旋亦廢去今所彈者皆研精
歲久竝師傳勘譜親授指法猶未敢言妙每以授人聲數
句度用指法則毫寸不差如指下妙音亦出人性分不可
傳也嘗覽操弄之名凡數百首然自古琴者祇工三兩弄
便有不朽之名或自制雜弄或傳習舊聲固不以彈多爲

妙也今人皆不知志惟務多爲故云多則不精精則不多也夫鼓琴之時雖無人須畏懼如對長者則音韻雅正可以感動幽冥攬琴在膝身須卓然乃定神絕慮情意專注指不虛發弦不誤鳴凡打弦輕重相似往來不得不調用指兼以甲肉甲多則聲乾肉多則聲濁甲肉相半清利美暢矣左手於弦不可太高亦不可低弦不疾不徐手臂調暢暗用其力戒於露見夫琴之甚病有七彈琴之時目覩於他瞻顧左右一也搖身動首二也變色慙怍開口努目三也眼色疾遽喘息粗悍進退無度形神支離四也不

解用指音韻雜亂五也調弦不切聽之無真聲六也調弄
節奏或慢或急任已去古七也此皆所甚病病去則可以
爲能矣

陳康士

康士字安道僖宗時人有琴調十卷新唐書及通考通志
宋史俱見著錄

琴調自敘

余學琴雖因師啟聲後乃自悟徧尋正聲九弄廣陵散二
胡笳可謂古風不泯之聲也其餘操曲亦曠絕難繼自元

和長慶以來前輩得名之士多不明於調韻或手達者傷於流俗聲達者患於直置皆止師傳不從心得予因清風秋夜雪月松軒佇思有年方諳雅素故得弦無按指之聲韻有黃冰之實乃創調共百章每調各有短章引韻類詩小序焉

張元晏

元宴字寅節昭宗朝翰林學士

皇第十一男禎封雅王第十二男祥封瓊王制

門下成周之建藩翰也本以宗盟大漢之分茅社也先諸

子弟推強幹弱枝之義遵自家型國之文用能夾輔公朝
尊獎王室朕上承宗廟下撫黎元固安萬邦惠綏羣品事
必在於師古理寧繫於徇私爰舉舊章式爲令典第十一
男禎忠肅挺秀清明在躬孝敬本於生知端粹資乎神授
蘊題鞭之妙思慕置醴之前規第十二男祥美秀呈姿溫
良毓德體寬雅以成性持愿恭而立身踵爲善之懿圖繼
好學之休譽咸在齡猷克守義方必當益茂清徽俱爲令
器是用各分圭瑞並立封疆申以渥恩委之善地於戲當
綺紈之歲膺茅土之榮雁序聯芳大牙錫壤爾宜簡以莊

眾儉而在公善友應徐敬師申白交修魯衛之政俾成虞
芮之風往惟欽哉服我不訓禎可封雅王祥可封瓊王仍
令所司擇日備禮冊命主者施行

授龐從武寧平難軍節度使改名師古制

門下沛澤遺封砦山奧壤俗稱雄富人本質良古爲用武
之鄉今乃優賢之地况自嬰多難極迫挺災蒸黎嘗困於
流離全材久專於綏撫旣觀試可爰議正名時舉寵章用
申獎勸具官龐從夙懷明畧早負壯圖精專能習於豹韜
環偉素推其鷺領襟靈豁達氣宇剛嚴居然將領之才邈

爾深沈之度差肩頗翦接武韓彭揚閭外之休聲富幄中
之嘉畫自委之畱事頒我詔條惠愛行於鄉閭威望揚於
士伍克成謠詠遠副憂勤臨戎旣耀於雄稜撫俗備揚其
善政遄移歲月足洽寵靈是宜錫以旌幢進其官秩奄有
徐夷之一境爰撫大彭之故都膺吾眷求永作藩翰於戲
敬敷五教光總十連踐論道之華資加御貴之榮級無忘
惕勵以奉恩光可某官仍改名師古主者施行

授王敬蕡武寧軍張珂彰義軍節度使制

門下錫以土田付之旌鉞必擇非常之士載宏不次之恩

况沛澤雄藩涇川巨鎮委用咸彰於試可節制宜膺其正
名爰舉徽章式分戎閫具官王敬蕡夙號將才早探軍志
襲淮流之積慶挺山立之雄姿勇實兼人智能周物蘊變
通之茂用懷經濟之遠圖具官張珂閥閱名門韜鈴秘畧
孝友克宣其遺美忠勤幼闡於令名劍氣干霄鳳音合律
撫士則能均甘苦推誠則可貫神明頃者頒我詔條各成
政化惠愛亟沾於疲瘵威聲益布於鄉閭爰自主畱彌觀
奉上既播寰惟之美勉承建節之榮仍俾疏封用光列鎮
噫碇礪壓境種落連營握兵符而皆是通侯掀大旆而具

爲上將當思報効以服恩榮敬蕡可某官珂可某官主者
施行

授馮行襲昭信軍節度使制

門下分節制之任所以嚴我翰垣膺廉問之權所以宣吾
風化矧夫界連梁楚襟束咸秦據廣漢之上游振終南之
巖險昔爲禦侮之地用固神州爰升連帥之雄以酬不績
言從人欲乃降朝恩昭信軍防禦使特進檢校太子太保
使持節金州諸軍事守金州刺史御史大夫上柱國長樂
縣開國伯食邑七百戶馮行襲決雲利刃逐日奇蹤彌衡

垂一鶚之名關羽蓋萬人之敵御眾布投膠之德禮賢懷
比飯之恭智畧出羣忠果成性造次不違於尊獎周旋備
覩於公勤自委以領條命之剖竹蒞事繼懸魚之美臨人
宣建隼之威疲繩既成其息肩蒙右屢聞於破膽獻奉無
閼賦租罔憊况頃者荆襄路途兵戈驟起而能遽開間道
俾達上京盡通江嶺之貢輸來助朝廷之經費尋彰績効
今有甄酬而一境緇黃數邑者丈咸陳章疏請降節旌膺
吾入保之榮茂彼登壇之寵往服休命毋忘敬恭可某官
主者施行

授李思敬宣武軍李繼顏保大軍節度使制

門下洋源奧區鄜畤重鎮近境深聯於甸服長川古號於
塞門念斯節制之雄略乃察廉之寄必資才傑用赴選求
乃者雕陰實惟戎事壁壘具勞於九拒干戈僅徧於四封
姑務安人爰從易地具官李思敬練達韜鈴振揚威望保
風雨不渝之操得寬猛相濟之機奉上誠專康時績茂常
蓄持危之志雅推御眾之能具官李繼顏驍勇馳聲剛柔
蘊用負致君之全畧逞邁俗之宏規克秉義方幼知忠孝
發黃間而破敵麾白羽以臨戎並早沐恩榮俱分憂寄不

乏循良之稱亟彰持重之名繼成襦袴之歌顯著山河之誓今則俾之迭處用叶厥宜公台不改其華資終始各思其竭節於戩土田共廣爵秩互榮當遜志以保家勉輸誠而佐國勿恃險以生事宜恭已而守常服我寵光無忘敬慎思敬可某官繼顏可某官主者施行

授王潮威武軍節度使制

門下朕苦念蒸黎常勞旰食其在遐徼尤所注懷况閩越之間島夷斯雜非威望不足以懾伏匪仁恕詎可以惠綏其有善政已成殊庸未陟則宜假之鉄鉞錫以麾幢俾兼

節制之權式寵察廉之寄具官王潮術深金匱學富玉鉉
彎弧傳百戰之名撫劍號萬人之敵才高御眾志本勤王
風雲暗合於機謀霜雪不移其節概爲仁由已重士逾山
雅負將才猶精夷理自撫寧列郡振舉六條疲氓懷愛戴
之心漓俗仰廉潔之德集是休烈溢於聽聞而職貢交修
賦興靡闕尊主之誠可見勝殘之化無踰是用負海建牙
踰閩錫社徇彼遠人之懇慰其閩境之情爰壯中權仍遷
左揆爾其守茲舊貫服我新恩勿恃貴以驕人無作威以
生事更勵奉公之節益堅惠下之規別俟寵靈罔虧績効

可某官主者施行

授李繼徽秦州節度使制

門下邠土雄藩西郊故壘封境克連於甸壤城池近接於
昆夷爰膺節制之榮兼奉察廉之寄向非雄傑孰稱選求
况仍歲干戈未蘇惇獨鎮靜允先於良將拊循猶藉於通
賢得不因彼士心茂茲朝委我有休命人其聽諸具官某
生知武畧夙號將才得黃石之沈機總青萍之利用貞心
貫日壯氣凌雲蘊豐財和衆之名遵抱義戴仁之事自四
郊多壘一劍臨戎推誠明以奉君親仗忠信以爲甲冑處

眾每觀其自奮遇敵雅號於無前茂著功庸動張節概乃
者剖符隴坻建隼吳山頒條早振其休聲守土載揚其善
政既委之鉄鉞錫以土疆撫成紀之遐封治秦川之拓地
投醪布德減竈傳謀憂國忘家赤心可見飲冰食蘖清操
難儔今則再寵綠徽是光黑稍增其好爵廣彼爰田用分
宵旰之憂式徇疲羸之請爾其將我惠澤施於一方簡以
臨人寬而整眾可推養賢之志用宏輯睦之規無怠親鄰
勉思稼穡奉於公者必舉涉於私者勿爲副此虛懷更圖

明陞

謝時相啟

某啟某今日伏奉宣召伏蒙聖慈令充職翰林者出自挺
鎔成茲忝越循涯積感揣分增榮某洛下諸生隆中散族
進取本無其聲援歸休復迫於羈離白首爲郎固乏堂堂
之稱青雲無路但甘碌碌之嗤愈迫低徊欲成淪沒相公
殊常降德不次施恩拔自迷途寘諸密地蒙虎皮於下駟
抑以騰驤絳鵠羽於寒鵠教之騫翥遂使專詔誥教令之
事爲言語侍從之臣內省辱微益深榮懼謹啟

謝時相啟

某啟某伏奉今日勅授尚書駕部郎中知制誥依前充職者某才殊敏健識異精通旣無環潤之姿焉有矜嚴之譽繆因鎔鑄驟陟煙霄掌禁苑之文詞列金門之侍從顧惟鯁淺尋過津涯忽自秋而徂冬每素飧而尸祿愈成覬冒益被顯榮相公曲示洪鈞重磨頑璞降始終之茂德宏特達之深恩再假丹青復掀羽翼遂使移粉署應星之列帖掖垣掌誥之名盡出殊私皆爲華給蚊蚋難勝於山岳蠹灰何報於生成謹啟

謝集賢相公啟

某啟某今日伏奉恩旨宣召充職翰林者出鈞鎔之巨力
收居樞之小材拔自塵泥驟陞霄漢撫已實知其忝越銜
恩載切於屏營某洛下諸生朝中孤宦進取本無其聲援
歸休又迫於羈離旣碌碌以終時亦悵悵而度日伏蒙相
公十九兄殊常降德不次施恩生暖甲於枯荄化豐肌於
朽骨出諸陷阱置在門闈粹鵠羽於寒鵠教之騫翥蒙虎
皮於下駟抑以騰驤但自捫心何階報德况專詔誥教令
之事爲言語侍從之臣內顧寡微益深榮懼惟冀永賚肝
膈長託鑪錘但當有命以酬固亦無言可謝謹啟

謝奉常僕射啟

某啟某今日伏奉聖旨令充職翰林者龐鴻恩重蟠蟻命
微循涯增感激之誠揣已積叨踰之懼伏以某名慚鉅下
人異隆中無賦雪之詞華多論天之才辯頃歲纔萌進取
便獲攀投及門人指其登龍託質時推其附鳳因得交朋
改觀行止增光遂忝決科俄榮筮仕始優遊於諫省旋履
厯於霜臺郎署一棲星霜六變而偶茲多難方困迷津永
無振奮之期益勵退藏之志僕射憫其孤拙哀以棲遲忽
垂大恩顧及衰緒孜孜保證矻矻維持竟使凡材遽膺劇

職參玉堂之侍從掌金殿之書詞榮非始圖事過初望惟
誓永將死節上報生成倍激糜捐冀申萬一

謝奉常僕射啟

某啟某伏奉勅命授尚書駕部員外郎知制誥依前充職
者某藝能無取才格俱凡任孤僻以趨時守顥愚而樂道
敢於榮顯竊冀遭逢伏蒙僕射不次垂恩踰涯降德雕朽
曲施其敏手磨鉛俾耀其銛鋒因得擺脫塵泥昇騰霄漢
專玉堂之詔誥追金馬之遊從尋過津涯每慚覲冒孰謂
纔踰累月又陟華資南宮秩換其詞司西掖名參於演綺

生成益被灰粉何酬感深空集其涕洟恩重但期於隕越

謝尚書丞郎給舍啟

某啟某忽蒙宸獎擢處內庭循省荒蕪倍懷兢懼某才殊
二妙譽媿三英趨時既乏於梯媒退跡倍悲於萍梗某官
常迴恩獎曲賜吹揚遂使虛辱成茲忝越列侍從於金門
之下掌書詞於禁苑之中榮非始圖事過初望

謝衣段啟

某啟某伏奉手誨伏蒙相公十九兄特以某初叨宸獎賜
及衣服段等捧戴尊念感激伏深況鶴紋價重龜甲樣新

纖華不讓於齊紝輕楚能均於魯縞掩新蒲之秀色奪寒
兔之秋毫莫稱頑姿難勝縟旨倍切肝腸之感永爲褐襲
之榮謹啟

謝宰相啟

某啟某文愧靈蛇質慚威鳳謬因鎔鑄遂竊顯榮粉署握
蘭誼有堂堂之稱禁林視草全乖藉藉之名驟忝轉遷盡
由擡舉伏蒙相公俯迴念錄過賜褒稱尊誨下臨恩言俯
被假金駿爲駕駘之飾賤骨難勝引朱絃於燋朽之餘深
恩有自

謝草詞啟

某啟昨日獲忝轉遷出於提獎伏知舍人次當視草曲賜
褒稱裁成五色之紛綸啟導九霄之渥澤過勞江筆潤色
堯言指頑石爲瑤瑾之流謂駕馬有驛驅之足揣循驚感
倍切肺肝

未名試先與奉常啟

某啟某人惟冗末地匪清華異前修稽古之勤乏往彥求
己之志偶塵科級旋履宦途甘蒙碌碌之嗤實愧堂堂之
稱惟思勇退祇欲自強孰謂僕射念及孤沈獎茲顓僻遇

孔黎之津潤別借齒牙因姜被之包容俯明肝膈昨晚面承尊旨曲奉溫言直欲拔自塵泥置之霄漢恩旣生於望外喜載溢於情衷况憫恤垂仁念惜兼至假毛羽而使遂騫翥迴鞭策而俾學騰驤盡自生成益隆邱嶽但慮藝無所取材不足稱仰累埏鎔或孤擡舉誓節永依於門館酬恩冀盡於死生苟違斯言是欺皎日

未名試前與孫相公啟

某啟某昨日早趨崇屏面奉宏慈承許與之恩言荷提拔之隆旨循涯自失沒齒知歸某孤拙無媒迂疎寡合且乏

幹時之具仍慙悅世之機一忝班行八移年歷未絕遭逢
之望分無騫翥之期伏以某官光輔不圖啟迪昌運當此
艱危之際克展經綸之才孰謂庸虛亟塵褒採况丹霄侍
從清籞遨遊畀資枚馬之流以闡堯湯之化顧茲辱薄詎
可論思倍懷感激之心冀竭効酬之節但以鉛刀鈍質不
可廁於龍泉瓦缶凡姿固難齊於神鼎雖感恩而載切實
顧已以難勝

上承旨崔侍郎啟

某啟某才非敏達器異閼深乏百函飛翰之能虧九紙課

詩之業植操虛凌於霜雪干時未脫於塵埃自忝班行尋
踰涯分豈謂承旨侍郎念茲單拙憫及埋沈密迴吹借之
隆私顯示挈維之重德今日早面承尊旨曲奉恩言必欲
拔自泥沙置之霄漢擇千里驛驅之足未棄駕駘合九成
韶濩之音不遺遠邇感深泣下喜過悲來但虞不稱雕鏤
實慮有孤提拔循涯揣分感德慚恩之至

先與承郎啟

某啟某伏思借其羽毛則鎸翮者能飛鼓以笙簧則無心
者知感輒陳引喻仰謝吹噓某濮上庸音璠間賤品植操

但期於霜雪趨時未脫於塵埃徒激攀棲難希褒勵近者
伏見宮相楊侍郎右司趙員外奉揚尊旨竊話昌言伏審
侍郎學士俯錄鯁微獎稱辱薄指其迂拙謂以貞修假鉛
紅於蕞陋之資迴剞劂於離奇之木感深泣下喜過悲來

下元金籙道場青詞

維乾寧二年歲次丙辰十月戊申朔十二日己未嗣皇帝
臣稽首太上聖祖大道金闕元元天皇大帝伏以強名曰
道迥出氤氳之表惟天爲大是生恍惚之中融和氣以陶
蒸藹真風而煦育况黃庭碧落集列聖之威儀絳闕丹臺

聚羣仙之步武爰起祈恩之路實開請福之門敢用真誠
陳於下會今雖物無疵癘年獲豐登遠人不倦於梯航絕
塞靡虞於烽燧而鯨鯢作慝蛇豕爲妖塗炭黎元黷亂紀
律宮朝載罹於焚毀簪裾仍迫於羈離敢不寤寐思憊曉
夕引咎於是廣延真侶重叩元闕幣帛交陳香燈備設伏
願堅覆露之德暢亭毒之恩使氛祲盡消萬彙咸泰復安
宗社大定寰區及臣眇身同霑宏造謹詞

李浦

浦官右拾遺

通泉縣靈鷲佛宇記

出梓城百三十里山開而川長城川而爲之縣縣其名曰
通泉由縣以出西山峭而壓於泉宇巖而爲之廟廟其名
曰靈鷲靈鷲居通泉僧境之絕其初有頭陀僧選而居焉
僧有神通力乘白驢與自象同視一眼而五眼具蜀民爲
商者行及太原北上五臺山求見大菩薩眾堅莫能致有
老人出曰菩薩在蜀爾弗見耶奚遠跡吾山焉就窮所隱
指是頭陀卽其人還蜀而望拜且深訴其辭爲商者因大
布所聞自是頭陀乃徧告邑人以西行邑有烏衆寺僧騎

白驥揖對言別畧無差焉咸請備僧食而餞不移晷而千戶畢至歸無疾而坐終巖上幽隱而來化自顯而化去少動蜀人之耳目暨藏其身巖側百餘年僧宇大廢剝巖發其骨深莫能獲殆今無遺跡窅不可測獨有所刻佛像有感必契前邑長以頭陀勝跡不可泯閉於巖穴中及僧居盡復顧像在巖猶感聲其事後數十年方啟其跡而宇焉僧有惠澄者能經律有道行未能成其宇而卒邑人共致禪僧道嚴續而成之是宇也中出翠微旁開石室古木凝黛疎篁鎖煙於冬夜燠當夏晝寒且屏立前峯席鋪四野

望冠羣宇卓然境異異泉石出滴其涓流而通大像之側
自一而干汲必敷其用泉與像跡始於頭陀於今靈不絕
焉浦客是邑日登是山或夕景將過曉色未隆當軒月行
半壑雲起披襟獨嘯萬象在目而嚴禪師端居禪室客塵
不動教所謂證戒定慧乃自戒以得定自定以入慧也言
不戒而在定者妄人耳未定而求慧者妄人耳今嚴定不
離戒而慧可求吾信其能嗚呼天下言禪者多矣行禪者
寡矣嚴其行禪者乎同居僧法如亦久遊禪林深入禪境
心相契而事同其徒行源律自束而禪習焉齒甚少未可

紀其巖室浦以文自處豈識禪者耶徒見待以頭陀之前事未有紀者希頌而刻之得述其靈異之旨并嚴禪之跡同碣於巖下光啟二年丙午九月九日立

莫休符

休符光化二年檢校左散騎常侍守融州刺史兼御史大夫

桂林風土記序

前賢撰述有事必書故有三國志荆楚歲時記湘中記奉天記惟桂林事蹟闕然無聞休符因退居粗錄見聞曰桂

林風土記聊以爲敘

欽定全唐文卷八百十九目錄

邢甚夷

唐廬州重建巢湖太姥廟記

刁尚能

唐南康太守汝南公新剏撫州南城縣羅城記

張保和

新移撫州子城記

唐撫州羅城記

楊鉅

授陸扆平章事制

授王搏威勝軍節度平章事制

授韓建華州節度使制

趙凝進封南康王制

冊淑妃何氏爲皇后文

唐御史裏行虞鼎墓誌銘

房鄴

少華山佑順侯碑頌

張蟾

無爲寺記畧

崔塗

渠州冲相寺題名

孫珣

唐故清河郡張氏夫人墓誌銘

崔遠

授涇州節度使張璉檢校司徒同平章事制

授蘇文建邠州節度使制

薛昭緯

廢德明四廟議

韋昌謀

靈應廟記

蘇圖元

崔令尹頌德記

欽定全唐文卷八百十九

邢甚夷

甚夷守濠州文學後爲館驛巡官

唐廬州重建巢湖太姥廟記

太姥神廟於巢湖邊久矣其靈跡所自陰隲之功傳於人間斯不復序無何中和中爲行寇所燼其屋壁竹樹無子遺焉時以國創中興日不暇給雖人懷敬尚而孰能葺修故靈儀殿庭備位而已合肥數年前嘗爲鄰郡所覬我軍設備營於柘塘陰有所關亟戰未利士因怠鬪咸思迴戈

今太守尚書時九苞未彰隱於將領亭午之際惛然寐酣忽夢覩粧人連掣其袂比及寤已見披堅輩盡飾歸裝公由是傳刃以遏之號令以壯之翌交鋒乃有享獲公記覩粧者卽太姥神向非夢來幾致師潰尋祝曰苟終垂祐當營祠而酬爾後以伐叛摧兇不虛其歲汲汲於追奔逐北豈暇於掇日興功文德初淮南節度畱後兼行軍司馬宏農公司空酬公前功奏以知郡有詔宜依龍紀元年秋七月大梁淮南兩道連帥東平王沛國公中令以公能理奏請正授其年十月綸誥至公乃減費聚俸將踐願言故匠

得良工材獲異木不日不月懋功就焉觀乎鴛瓦攬空虹
梁用壯妙臻土木美極丹青旣竭精誠悉合制度君子咸
謂公心匠宏瞻信誓端慤無負於神祇焉公之理民也以
仁明其統衆也以嚴正遠聲色以律下屏讒佞以清心屯
甲士護封疆不黷武放肆積金穀備支費無潤屋覲覩嘗
欣祿已及親每患政未及物其懲惡也雖親戚腹心無所
隱其賞善也雖樵漁牧圉無所遺其待士也雖襯禮龍鍾
無不延其聽訟也雖衆惑羣疑無不辯加以推忠向國盡
力酬知視榮華如浮雲以功業爲已任則不知古之良二

千石相去幾何故得寇輩每來棄甲遐遁農經二稔廢歇
有年商貨駿奔鄆易霧塞民之遂性如大駕未遊前且昔
在昇平未易致此況今多事不亦難乎哉甚夷宦遊求知
蒙待不次旣覩盛事其可無言因請刊貞珉紀不朽希數
千年後知廬江有賢太守也時龍紀元年己酉十一月十
一日己亥記

刁尚能

尚能官太常奉禮郎

唐南康太守汝南公新刱撫州南城縣羅城記

撫州屬縣南城則古之緊邑也漢高祖六年會將軍灌嬰襲滅項籍之後割豫章南境分立爲縣以飛猿南豐二源合派又以西崗土貴勢強而肇其址也以其城在洪州府城之南故曰南城其後歷於晉宋雖興亡而則多唯斯邑而不滅至吳太平二年始立臨川郡以隸南城而屬之焉管一十三鄉周巡六百里林奇谷秀則鶴嶺牛山無以加水遶川環則洞庭陂澤不足比人繁土沃桑耕有秋學富文清取舍無悞旣狀周道兼貫魯風萬戶魚鱗實謂名邑暨乎咸通初襍狂姦不賓嘯聚而來犯我郊趾國師旣舉

斯邑舟車通濟令以轉輸雖則民勞功業未墾及至乾符
之歲水旱不常或波蕩林邱或塵揚沼沚蝗螟敗害歲力
凋虛教勸不從魃穀斯舉天反其度地亦爲妖火旣燎原
鯨潛鼓鼴生靈浸敝宸睿是憂非朝典之不施乃俗暴而
難整遂使敵震郊野禍作蕭牆縱陳湯網以籠羅或有弄
戈而怙亂是以皇都失禦玉輦蒙塵旣乖華封之仁爭起
有苗之叛近茲嵒澤乘時寇興皆拋順靜之規各振縱橫
之志猶賴寶祚延遠百工得人於是又有我常侍武銳孫吳
文英廉簡心韜杜庫性蘊班籌乃召我兵共征不謐因得

名重於臨淄將帥威過於屬部諸侯奪劍一呼強梗淪伏
緝綏撫甚疆境帖然郡縣如初鄉關法舊次命文德之臣
繼總兵師克復咸京巨盜旣平採訪忠讜謂以汝南公道
存修已信在佐君端雅聲彰溫亮言顯成紀綱之範爲經
濟之箴慶匹豐泰之期清諧中和之樂糾其政化奉以昭
蘇旌德業以分憂錫賢能而封秩乃皆寵渥爲南康太守
焉時以塵幢未行邊鄙猶擾乃召諸將而謂曰凡征伐卷
舒在乎人意戡難輔時在乎人機今以烽燧尚興祲氛未
息因觀聖人作易而有豫防雖同鶴以擇林亦慮蠭而有

毒宜得營壘備其梟鵠乃遣行教布令不日萬人公乃指
畫規模勻其版築悅而不勞寬而得衆齊心似一樂運如
流不越二旬其功告畢周回一十三里闊一丈六尺高二
雉露屋一千一百三十間敵樓三十三所東西鑿八門南
北二門門則通衢焉於是崇墉截漢昆陽不足以爲堅峭
崿凌雲金城不足以爲壯控五嶺封疆之要扞七州寇徼
之虞覬覦者不得動其心毗睚者無以運其智可以拒鶴
鵠之陳可以拔烏合之徒內則軌轍齊驅堪敷權畧外則
民人側目愕以堅勞護吾君租稅之封授黎庶安居之業

得此名邑克全大寧爲今辰定難之基是岳牧勲庸之績
可謂能高異代善亞先賢象偕魯北以利民憂入晉陽而
翦敵以尚能茂修片善命述宏圖才雖匪於英華事得銘
於雄麗刊於燕石以紀殊功時以大順三年龍集辛亥三
月四日記

張保和

保和大順時人

新移撫州子城記

八卦成列象在其中聖人則之剛柔險易動靜悠促亦皆

備矣是則金木水火輪移消長乾坤震巽羅列高下揆情
偽至於化匠稽微闡極於大成蓋有有無不有矣物物無
不物矣至如舉一趨百制邇應遠者有夫光宅焉宅天下
者嶠崕之強歟宅邦邑者岡阜之勝歟宅閭巷者隆坦之
宜歟自穴居至於大壯猶椎輪形於玉輶其必如此按撫
之郡庭初際於亥壬綿厯年代寶應中太守王公圓以其
勢卑於郵里疑悍民而沮長因徙於西陲自爾亦匪厥中
觀夫用壯而非剛虛右而擁左總詳其朕則二千石列郡
比比有不大遷者是其事矣大中中刺史蔡公京審於三

地思事再革以勞費滋廣意行力止乾符中巨盜起梁宋
兵火照天下干戈日用屠薙鋒起畿甸失禦郡邑曠守斯
時也豺狼塞路瓦礫遮轍此之官舍棄如焚如荆蒿蒙春
井野一色洎汝南危公奮長劍倡義旅併翦羣惡克蒞百
城草刲碁布紝隸績斷詔下之日默究形勝且曰幼少嘗
聞前任遺議今也運會萃吾指陳大凡元亨中正會要方
乘宜拔乎嵩高麾震揖巽朝辛附癸在控於躍伏苟差毫
髮其致懸殊爾乃決意卜築應手經始舍去舊地推移一
區而勝秀逸得嚴整鬱備納溪山複疊之勢吐原野蟠連

之色有若龍騫鳳舉花攢綺錯於是左通臺門南正戟扉
三扃三廳大寢小寢局署狴帑環迴星列峨東軒以資眺
覽峙西閣而備宴見奢儉折中材力攸允廣陌繩分列肆
鱗矚繚崇墉備固護之態襟平陸延爽垲之景然後政化
以安之禮法以康之仁和以富之遠者來而近者休險陂
革而幹蠱用星霜既周間井以繁年穀登穰士馬精研連
帥倚爲右屏天子寵爲良牧百姓歌之聲聞九重璽書慰
勉增爵褒命其猶珠貫公少秉奇志年甫壯室遭時建名
起家而萬石非偉許國而一心彌厲而後乃今譽積望洽

豐德懿範繼以輝綽雖山河之重巖廊之峻恐無自避也
君子曰地載萬物賢人應之蓋合其用而享其祉忤其道
而戾其契匪私於富貴勿抑於隆盛也若成王之定鼎邾
文之遷繹奉春之建都踵其數而舉其徵者矣保和前紀
羅城內慙拙文暇日復聆當世之譚曰事成乎身及乎人
力之次也顧惟是續蓋表悠久載讓弗克唯而直書巨唐
龍集庚戌年在大順律中南呂戊寅日張保和記

唐撫州羅城記

夫開物成務聖人馭世之通規保大定功諸侯因時而善

治醇素既降智慮萌生物垂結繩之約城有重門之警國崇雉堞境藉金湯物理固然其來尚矣且如秉四方之用行五等之道酌損益於未兆裁取舍於永存總括冲機富有大業者則羅城版築久逸暫勞千載一時義斯見矣請言其實國家自貞觀甫平之初文軌均化干羽率服武事鮮備郊壘夷沒間者天寶建中之亂或釁起兩河或毒流三輔江漢之外攬捨殆微故支郡屬邑封閉而已洎先帝幼冲之始數丁九六物極屯難長鯨吞噬以橫流大厲元黃而噫氣饑饉仍荐兵戈重復暴骸徧野游魂慘天人煙

斷絕羅城莽爲邱墟罄毒馮陵松楸斬爲干盾天涯地角
邈然喪亂之事邱甸要荒紛如征伐之苦臨川古爲奧壤

號曰名區翳野農桑俯津闡關北接江湖之脈賈貨駢肩

南衝嶺嶠之支豪華接袂既而封豕逐發飢鷺攫碎相視

爲盜割據而逞連延數載羅列

闕二絲綸捶

闕品節既慢

汝南危公挺英逸之資運匡濟之畧倡起忠義志惟掃平

初黃天感嘯聚歡踴衆踰數萬兵勢殄殲勢摩中原刺史

李公字

闕二先爲脣遂始僭廟號大署僞屬其餘孽堡妖壘

互相支屬犬牙魚貫肘跗繩約莫不競好兇吻爭踐王師

出征比比而北總戎闕一
字 錢闕三
字 外壞公爰初誓衆靡盈

數隊兄弟親愛翼以從焉勵力一致所向神速誠明激天
故恢廓闕二
字 由是兇邪清辟次第潔雪不五六稔諸惡畢

拔蕪慕送款飲清歸轍不可勝既公擒縱之外按舉無必
推誠以同務剔剗蠭舊叛成闕一
字 指揮而化二道馴致勤

王之事撈疲繭挽養瘡痍誘還逋逃闕一
字 復耕種凡據鞍

甲蒙矢石引少擊衆環攻鏖戰不繹銳闕一
字 暖席涉乎七

載破嵒洞擒酋豪偃戈闕一
字 析踰二十算四邑以之康定

鄰疆自因慄伏中和五年三月下明詔假符竹褒美成節

慰安井閭於戲物不終否天樹司牧亦明矣當拱天闕之
際孰知其故闕六字之詳所以非其時無以彰其才微其用

不能靜其亂偉夫忘身循義大節橫秋氣凌丹霄精貫白

日其中正之行

闕五字

義士子來摧虜剛悍鑠絕虺蜴其武

烈也寬以得衆靜而有法導德齊禮敦本今古其文昭也
舉善遏惡先教後令去不急之務流洪彰之名其政術也

四者立而衆美附之條張而百姓服鼎新綱紀草創解署

於時乘輿暴露海內涕

闕一

兵不過地靡有定公

闕一

檢

制之中收今日始未遑接棟惟謹然烽彼皆眩惑於狼心

我豈因循於雉堞所謂大君憂寄闕三字在守土赤子依投

闕三字

豈忘城壁苟無捍閑之所有如緩急之事外乃備預五材
經營百堵目運心匠規令矩定金甌取勝鐵甕事奇荷鋤
蜂攢以闕一字舉杵雷興而膠固無執撲之勞非奪農之志崇

崇帶繞他山之秀色爭來屹屹雲平列岫之祥光俯協歲
在丁未律中南呂始事冬十一月訖去奢也周十五里高

二仞酌中也敞八門通馳道便事也古人有言大夫出疆

以利國家爲已任賢者處世能安社稷是盛業矧夫九圍

多難之日

闕二字

失馭之年一呼而豪

闕三字

再而領綱振不

驕矜以任欲能撙節以茂績衆心成城一德化俗其勤也
杜當陽之武庫廉叔度之嘉謐漢宣帝每云所欲共理天
下者惟守宰而已今天步未康去疚有一於是東顧之勞
可罷有十於是太平之作可待異時登天朝翼景命舒之
於五侯九伯表之於煙閣麟臺濟時策勳在我昇穀豈惟
撫城獨稱不朽豈惟撫民獨居多佑者哉保和謬當殊遇
闕一詳具美奉命紀錄顧慚不文大順元年
下
字闕

楊鉅

鉅宰相收子乾寧初以尚書郎知制誥充翰林學士拜中

書舍人戶部侍郎封晉陽縣男從昭宗東遷爲左散騎常侍卒

授陸扆平章事制

門下昔在太宗時則有房杜持國鈞在元宗時則有姚宋司政柄降於列聖代濟名臣是以股肱元首之間未有不相資以成者也况我荐逢艱運方討叛臣宜搜間代之賢冀適濟時之用其有懷材已試亮節孔彰俾膺霖雨之求期正彝倫之敘式舉茂典吾無所私翰林學士承旨銀青光祿大夫守尚書左丞知制誥上柱國嘉興縣開國男食

邑三百戶陸辰簡節正音溫光瑞玉咸濩抱降神之韻珪
璋挺華國之容包倚相之典墳紹平原之詞藻爰自高才
赴召丹地代言絲綸必本於典謨獻納已觀其事業仍歲
扈和鑾之狩六年專詔誥之勤讜正自持聞望彌峻況爾
伯祖贊昔以才行嘗居禁林當德宗避狄之時實乃祖納
忠之日積其偉節升于鼎司書命諫章流在人口是用選
自密勿陟之台衡昭于前光期於休命職我人柄貳茲地
官旣表殊恩且明丕訓於戲奸宄尚熾干革未平生靈流
離宗社慕莽爾其舉墜典正頽綱進賢良遠姦慝勿依違

而避事無拱默以叨恩庶乎艱難有望康濟往踐乃位敬而戒之可尚書戶部侍郎同中書門下平章事餘如故

授王搏威勝軍節度平章事制

門下朕聞有國家者內則立四輔以貞百度外則建羣臣以寧八區持吾重權惟此二事其有弼諧之道已溢於簡編是期訓撫之規更滿於方岳中外迭處古今所榮扶危匡國致理功臣金紫光祿大夫門下侍郎兼戶部尚書同中書門下平章事監修國史判度支諸道鹽鐵轉運等使上柱國瑯琊郡開國公食邑二千戶王搏長淮允慶維岳

降神抱文行忠信以飾身範珪璧瑞璜而爲器動多偉節
言必匪躬自踐歷清華汪洋令望左垣譽謌之稱凜然古
風右披絲綸之功垂作雅誥爾後恤刑著效免賦推能陟
於梅霖掌我金穀果罄致君之道無慚出相之門忠謀必
成茂績仍舉朕念於越多罹兇狂狡童旣平疲俗未泰是
思被我寬政播之皇風厚其澆漓滌彼汙染再造其任求
才惟艱輒於三台先以十乘不改巖廊之任用資垣翰之
光於戲阻於重江負於滄海地號殷厚屬爲剽輕雖兵革
乍銷而間井猶弊撫循之理可不慎諸副吾任賢俟爾報

政可檢校戶部尚書同中書門下平章事散官勲如故充威勝軍節度浙江東道管內觀察處置宣撫等使使持節
越州諸軍事守處州刺史

授韓建華州節度使制

門下越自去秋狩于太華萬乘所至兆人是歸而大無不周細無不具其間舉重典振頽綱封畿肅清宮闈斷度罔有廢事其故何哉吾有誠臣社稷之福今馮翊近藩襟帶河渭撫馭不謹煙塵忽驚將堠廓清爰考前績宮占蔽志吾何疑焉具官某星緯炳靈山河間氣理先正本謀必應

機知義安居士皆盡力厚生利用人得保家閭閭則咸仰
吏師軍旅則共推良將范宣子先興讓典成安君止用作
謀以標式大朝準繩列鎮一受命則表章十上以得請爲
期一推心則忠孝兩全以奉公爲本總是全德實吾偉人
今者沙澤之陽疆理相接厲階斯構改作是宜俾兼統制
之權允竚撫綏之惠爾當視同如華濟猛以寬則吾坦然
人俟安一敬服不命以孚于休

趙凝進封南康王制

門下叩黃鐘者大則大應建殊績者多則多醻匪我之私

惟人所召亦若樹桃李者而獲甘實勤藨叢者必蓄羨糧
安有豐功而無貴仕况我襄峴奧壤荆吳要津資上將之
撫寧興庶人之歌詠宜旌善政以馭殊榮豈惟醻庸式俾
垂勸具官趙凝訓承馬服術茂龍韜蘊倜儻之宏才負縱
橫之遠畧性惟忠厚連營懷敢死之心德尚寬和比屋佩
來蘇之化加以戴君義切許國誠殷集列岳之梯航贊大
朝之經濟憂時奉法曾不捨於朝昏問俗撫封固尋彰於
遠邇使鳳闕罷柝夏水澄源歡康以布於百城政令克齊
於五屬是用特申異數用顯休勲封崇既盛於一時寵貴

仍遷於右座爾其彌勤後効益暢前修爲垣翰之準繩遂
鄉間之帖泰永刊鐘釜以奉簡書厥惟不承勿忝休命

冊淑妃何氏爲皇后文

門下朕博採大易眇觀詩訓觀柔剛感咸之象賦鳴鳩肅
雍之德將以視天下之內理敘人倫之大端宜于家邦厚
示風化矧九廟在上籩豆是薦三揖在下彝章具陳得不
敬乃禕渝稱茲典禮俾承光於軒耀式正位於坤儀淑妃
何氏明配圓靈德符厚載珪璋特達鸞鳳萎歲同輦必辭
脫簪能諫四德克備六宮是推述壺職以彌勤煥形史而

斯美況惟元子旣登儲貳順考古道雅協徽章受貞吉辰
歲於盛典咨爾克持婦政以率內和齊莊是儀用諧靜德
明章之道允在茲乎

唐御史裏行虞鼎墓誌銘

公虞姓諱鼎字少微本會稽人祕書監兼宏文館學士贈
禮部尚書銀青光祿大夫永興郡公謚文懿諱世南八世
孫曾祖致江州刺史祖敏宜春令父汀東魯別駕公性敏
好問學月開日益卓然老成登咸通十年進士爲校書郎
累遷至御史裏行舉彈無所避謇然有聲於時尋陟饒州

刺史視事嚴且明人吏歛手莫敢爲非乾符二年黃巢寇
饒州公出禦之戰甚力賊益至勢不能支城遂陷公及劉
鄭二馬衙出奔夜宿芝山祠夢神曰一馬之前錦然之田
逢禾卽止遇旱卽遷旣覺莫喻其意次日道由餘干政新
鄉馬爪石而伏公登山禱曰天其或者欲謀居此乎馬乃
起騰至錦田旱禾源與夢適符遂家焉公遭時艱不克居
其鄉因見山水清秀泊田宅爲休老計聞人道國事升降
消息卽喟然長歎不食竟日無事與山翁野老相往返厯
厯談桑麻事意泊如也公生會昌元年九月九日卒同光

元年十月十六日春秋八十三卽以其年十月十八日葬於安仁崇義鄉善政里饒山之陽夫人王氏父式觀察使女男一人盤孫一人丈仲未葬前盤來乞銘曰予嘗有託於夫子也冀出一言爲永遠記况鉅與公同年知公爲最深銘安得而辭耶銘曰

厥存不爽厥施爲何宜爾子孫其類並多

房鄴

鄴字正封臨淄人

少華山佑順侯碑頌

上嗣位九年以宗室弄兵皇居失守大駕東狩至於華嶽
明年同華連帥太傅許公罷藩邸兵復諸子位正皇儲立
母后朝廷乂安中外咸若又明年宮闈復就乘輿反正封
少華佑順侯崇祀也始者內兵擴起右輔騷然驚蹕難追
宗社不復扶持關輔徒爲局鑄抗表奉迎莫迴天眷公卽
馳單騎詣行在所肉袒徒步跣雪泣上言曰廟主不行陵寢
不告蒼黃順動莫知攸往况西無正名之伐東異省方之
行南征無復國之期北濟乏召君之慮華當闕右不遠王
畿未虧巡狩之名免負出君之恥可以爲百辟會朝之地

諸侯輸貢之府地雖不廣足以助供億兵則非衆足以備
扞禦時也謙論確然宸心不返宣問往復至于再三嘉謨
不聽忠言不納大事將去羣心洶然關內諸侯惟公獨任
非神啟聖不能釋明主之疑非神佑忠不能壯純臣之節
旣而上察公之志不可奪也諒公之言不可復也由是天
迴日轉龍起雲從乃睠是邦因駐清蹕上復交泰之道下
無疑間之憂內難旣夷外兵以息皇嗣之不正者濱於五
紀今則因公以正之坤儀之不定者殆乎百稔今則因公
以定之君臣以協父子以親夫婦以倫有國之大本也公

一舉而得之豈筆舌所能論哉咸以公仗順討逆神實佑
之佑順之封非神莫尸璽書爰來牲幣以告是命下客書
石誌之鄴耳目奇功縑綯具美授簡執筆畧無愧辭姑錄
許公貞順之誠少華保佑之實以明報神以勸事君至於
極天鎮地之崇固國經邦之力降神生賢之運仙峯靈掌
之奇嶽有舊封國有常祀今之紀述故不復云頌曰

惟華之始因山以紀蓮峯東秀終南西峙少華居中不封
不紀歲在景辰暴兵中起天子震驚蒙塵旅次豈無近藩
諸侯莫至惟我許公聞風奮臂一騎迎鑾六龍迴轡行朝

有亭行廟有位宗戚以歸兵戎以弭爰立母后始正皇嗣
乃君乃臣乃父乃子家國大倫禮無違事祉既啟侯封亦
明祀金天之毗佑順之美乃刻貞珉永證惇史

張蟾

蟾昭宗時棣州刺史平盧節度使王敬武卒其子師範自
稱畱後昭宗命崔安潛代之師範拒命蟾迎安潛師範攻
之拔其城遂見害

無爲寺記畧

花開寶殿文粲瑤堦百堵興而門闈崇萬楹疊而廊廡對

寺有名僧五千人

崔塗

塗字禮山江南人光啟四年進士

渠州冲相寺題名

中原黃賊煽亂前進士崔塗避地於渠州春日獨遊冲相
寺由此登眺翌日乃歸

孫珦

珦昭宗時人

唐故清河郡張氏夫人墓誌銘

噫夫人姓張氏其淑慎貞素稟自生知退讓儉遜不從於訓祇奉晨夕終始如一吁言乎不祿弃我私室蘭摧春霧蓮墜秋風隙影難迴逝波不返男一人高姐電影未分槿花已落女二人長曰奴哥穠花未開嚴霜暗墮次曰郭兒弁髮未總繼我門嗣夫人年四十有三以景福元年冬十二月二十日卜兆於府城之南雲門之下樹邱隴而銘銘曰

日月有度兮生死無常白晝其速兮元夜何長澑水爲鄰兮雲門是鄉千年萬祀兮春露秋霜時景福元年歲次壬

子十二月辛未朔二十日庚寅孫珣紀

崔遠

遠河中節度使璵孫龍紀元年登第大順初以員外郎知
制誥充翰林學士正拜中書舍人乾寧三年轉戶部侍郎
博陵縣男轉兵部以本官同平章事遷中書侍郎兼吏部
尚書天祐初從昭宗東遷洛陽罷相守僕射二年柳璨希
朱全忠旨貶白州長史被殺於白馬驛

授涇州節度使張璵檢校司徒同平章事制

門下書云用命賞于祖不用命戮于社然自三代以還未

有不戮暴亂不賞功庸而安國家定社稷者也近者徵其
銳旅討彼元兇不越月而捷書繼聞未逾旬而鎮城連下
易如拉朽勢若建瓴諒非昭代之才孰濟勤王之績我有
懋賞爾其聽之某官切玉雄鋒摩霄健翼智符靈蔡節貫
寒松繼乃父之休勲鎮于巨屏誓忘家之壯志控彼邊陲
積粟訓兵安人阜俗不忝登壇之寄彌光出將之門近者
宋文通顯背國恩堅違君命將清叛亂爰仗忠良首奉詔
書龔行討伐選射戟盤矛之將率控弦帶甲之徒旣已先
啟行復深入其阻立志無慚於馬革輕生不讓於鴻毛矧

聞纔出封疆繼降城鎮旣臨賊境克保隴城振貔武之威
聲斷螳螂之怒臂而又不勞經費自備糗糧惟踴躍以用
兵不因循而覩寇今則方憑妙畧共殄長鯨雖伐罪弔民
已覩訓齊之令而誅妖翦怪合資掃蕩之謀是用俾壯軍
威仍加相印以勵始終之効勿辜倚注之恩敬之戒之服
我不訓

授蘇文建邠州節度使制

門下梁漢古封河池名郡有關山之險阻當巴蜀之要衝
苟非勲賢不可輕授我今有命允爲當人某官截海雄姿

追風逸步得左馬右人之術洞玉鉉金匱之書加以幼慕
功名早懷壯槩攬轡蘊澄清之志臨風多慷慨之詞頃在
禁宮屢竭忠節四奉指揮之任久彰翊衛之榮洎委節旄
俾之鎮撫當巨逆梟夷之後是邠郊凋瘵之秋而爾復茂
政能益堅撫宇未周星律已播謳謠方深倚注之恩用安
黎庶旋屬干戈之患每軫焦勞旣互有奏陳慮多嫌隙冀
寧生聚爰職改更復以未戮奸兇方思勲舊殄寇旣資於
上畧總戎宜錫其名邦俾居十乘之榮以長萬夫之氣爾
其便提驍果亟赴征行破其城社之妖刷我宗祧之恥然

後仗茲龍節蒞彼雄藩高居將相之尊永保山河之誓人
臣之節丈夫之榮何以加焉爾其自勉

薛昭緯

昭緯贈刑部侍郎存誠曾孫乾寧中爲禮部侍郎知貢舉
爲崔允所惡出爲穠州刺史

廢德明四廟議

伏以禮貴從宜過猶不及祀有常典禮當據經謹按德明
追尊實爲遐遠徵諸歷代莫有其倫自古典禮該詳無踰
周室后稷實始封之祖文王乃建極之君且不聞后稷之

前別議立廟以至二漢則可明徵劉累梁魏則近有蕭曹
稽彼簡書並無追號迨于興聖則事非有據蓋以始王於
涼遂列爲祖類長沙於後漢之代等楚元於宋高之朝悉
無尊祀之名足爲憲章之騷重以顯祖懿祖皆非宗有德
而祖有功親盡宜祧禮當毀瘞遷於二廟亦出一時且武
德之初議宗廟之事神堯聽之太宗叅之碩學通儒森然
在列而不議立臯陶涼武昭之廟蓋知其非所宜立也尊
太祖代祖爲帝而以獻祖爲宣簡公懿祖爲懿王卒不加
帝號者謂其親盡則毀明矣春秋左氏傳孔子在陳聞魯

廟災曰其桓僖乎已而果然蓋以親盡不毀宜致天災炯然之徵不可忽也據太常禮院狀所引至德二載克復後不作宏農府君廟神主及晉韋宏屋朽乃已之議頗爲明據深協禮經其與聖等四室請依禮院之議

韋昌謀

昌謀官左補闕

靈應廟記

天子以吳郡公爲東川節度命中使錫節旄綿州刺史楊守厚畱中使舉兵向東川陰結東川督將竇行實爲應龍

劍節度楊守正武宣節度楊守忠以兵助之迫城顧公斬行實縱兵擊守厚走之龍劍武宣二軍往來綿劍間掠人民焚廬舍入靈應行祠翦伐林木飼馬殿庭其軍病死向半公曰順濟王奠吾土久矣今瀆褻斯甚神寧居之故廟距府十舍躬行視祀則離鎮委於吏屬則不虔於是遙祀於北山上陳徙廟之意命司存鳩工度材六月興役十月就功邃宇重門騰廊飛軒大殿東向南僚北吏置位施器簡工揆用皆公智匠觸類長之則知他日佑天子鎮寰宇肅廟朝扶教化正上下辨等衰揜才任之使萬物各得其

所亦如是也

蘇圖元

圖元大順元年鄉貢進士

崔令尹頌德記

內黃爲大邑亶甲之東墉也即爲藩閫咽喉而神散血脈
前吞馬頰右控龍崗列王豹變之鄉七雄虎踞之地張賓
崔皓曾施神國之謀荀彧田豐亦運制勝之策高旗長轂
雨驟雲屯綿歷歲華其來有日矣洎故南陽郡王恣其酷
虐縱彼兇狂納奸佞之言忘忠鯁之諫內弃貔貅之士外

連烏雜之兵禍及生靈毒流草木致使交鋒洹水決戰斯
疆尸滿郊原血流平地曹公之入徐壤靡有子遺項氏之
陟襄郊疑無噍類爰我相國謂左右曰然已息干戈未蘇
疲俗活吾赤子須藉良材乃衆舉博陵公毗爲之令尹語
於相國曰公甲門茂族禮樂名家蒞事惟能應機不滯累
曾撫字頗善畜牧若令尹以用於心可上稱尊意當如是
說召見怡顏親受化說以其斯道令尹旣得其命尋至茲
封煙燐之蹤燎庶土之尚爍刀劍之跡染間巷之猶腥蘊
室壞摧極目荒毀燕棲春樹人宿燒屯十家之中黔首無

一半矣國門之內肯使畱二三焉莫不測問鄉間躬詢比
星傷嗟待之起念通宵憧憧往來孜孜朝夕而又撫之以
惠成之以能均評勸之恩有推攜之能末途暮歲歸俗如
流襁負盈途接踵而至然後重修驛署置門榻之尤新再
構旗亭飾廊房之亦美相國乃賞其功幹遷任新鄉耆老
攀車兒童卧轍誼譁塞路行莫能行遞相讓之遂再陳請
乃問於相國相國聞而喜焉謂左右曰當來所舉信不罔
乎有此政聲宜從請矣即可恩以遠錫爵可就加纔厯周
朞兩授寵秩初允勸畱之請旋加正直之名信及蟢蟢聲

揚相府政追前哲名邁古賢不徇私而立身不苟媚而取
俗陶淵明之五柳更益芳聲宓子賤之一琴尤光茂績我
令尹潛敷陰陽顯著誠明愈四鄉之瘡痍蘇百里之疲瘵
洋洋德美嘉譽孔彰聊書不朽之功以紀他山之石縣尉
樊公德儒固騰芳詞林苗秀心澄皎月德鑿冰壺勸彼農
桑出不嫌於乘露聞其疾苦歸匪憚於帶星與令尹盡節
奉公勞神瘁思席無暫暖身不求安固力規畫不日完輯
此乃聲流衆口德叶羣情裨贊之功可謂大矣列在貞珉
以述政能大順元年閏九月十日鄉貢進士蘇圖元撰